

Lin

1

Petngendrei Ihnan Sane Ndre Sulo-on Ihir

¹ Ndre mamunen Petngendrei ihanan lok eleng pe lokpoi, pe sane ndre sulo-on. ² Odoke lokpoi indrehpa ndre mahkele ti pwi. Lok indrilik, sane hendre-en ndrohu sa pwi, handrai ile ke lo handrai. Wo isongoran lokpoi ndresih pe puko-on tan Petngendrei inemehleu ise pule-en.

³ Eri pe Petngendrei ipe ihpa, “Moleu kihir,” pe moleu ihir. ⁴ Iy indre-et ile eriy pe ihposan ipe huyen, pe iy ide kapetne-et odo moleu pe lik. ⁵ Iy iyuwen moleu ile “meseren,” pe lik ile “lukumwen.” Lukumwen inum pe meseren ihir. Rang eti sei (1).

⁶ Inum pe Petngendrei ipe ihpa, “Kapetne-et odo wo kah kihir.” ⁷ Ile pe Petngendrei ihanan yor iyin ndrokoron pe itlangan wo se ile eleng pe wo se ile pahndran. Pe ihir ihpa ndre eriy. ⁸ Pe iy iyuwen eleng ile “parar.” Lukumwen inum pe meseren ihir. Iy eti rang ruu (2).

⁹ Inum pe Petngendrei ipe ihpa, “Wo iyin pahndran eri kihtok kile ke sehir, pe lok puko-on kihir pe kipkos.” Pe ihir ihpa ndre eriy.

¹⁰ Petngendrei iyuwen lok ndre pusukon eri “poi,” pe wo ndre ihtok ile ke sehir, eri iy iyuwen ile “ndras.” Iy indre-et ile eriy pe ihposan ipe huyen.

¹¹ Inum pe Petngendrei ipe ihpa, “Kei pe sane handrai pe handrai ndre henerenge ti kah hehir odo poi pe hotou mbrwen su.” Pe ihir ihpa ndre eriy. ¹² Ile pe sane kei pe mundriu handrai pe handrai hehir odo poi pe hehwei. Iy indre-et ile eriy pe ihposan ipe huyen. ¹³ Lukumwen inum pe meseren ihir. Iy eti rang tul (3).

¹⁴ Inum pe Petngendrei ipe ihpa, “Sane ndre raman eri kah hehir odo parar, kile pe hampaninyan meseren pe lukumwen. Pe hampaninyan rang, pe rangen handrai pe handrai kinto lon kirsimas ndre sulo-on. ¹⁵ Pe su we hannai hosso parar pe heneraman lok poi.” Pe ihir ihpa ndre eriy. ¹⁶ Petngendrei ihanan mundroi ti mandra-an, madan iso meseren, pe ndrou ti lehyen, madan iso lukumwen. Iy ihanan su pudiy yi. ¹⁷ Iy iduwe horu ile parar ile pe hereneraman lokpoi, ¹⁸ pe mada horu kiso meseren pe lukumwen, pe we herempaniyan meseren pe lukumwen. Iy indre-et ile eriy pe ihposan ipe huyen. ¹⁹ Lukumwen inum pe meseren ihir. Iy eti rang hai (4).

²⁰ Inum pe Petngendrei ipe ihpa, “Sane mente-e lon ndras ndre sulo-on hohu ngoho su, eri hehir pe hohor hala sulo-on. Pe nenka-an hono-oh eri hehir pe hohor yi.” ²¹ Ile pe Petngendrei ihanan ni mandra-ane pe mo-one pe sane se yi honto lon ndras. Pe ihanan nenka-an handrai handrai yi. Iy indre-et ile eriy pe ihposan ipe huyen. ²² Pe Petngendrei ipatihii su pe ipe ihpa, “Oduu sane mente-e lon ndras oduhor kile lon ndras ndre mandra-an. Pe oduu nenka-an eri oduhor yi.” ²³ Lukumwen inum pe meseren ihir. Iy eti rang lim (5).

²⁴ Inum pe Petngendrei ipe ihpa, “Ka-an handrai pe handrai ndre henehti ngohon su eri hehir odo pule-en poi. Su odo

hangahang pe su puyep, mandra-ané pe mo-one.” Pe ihir ihpa ndre eriy.²⁵ Ile pe Petngendrei ihanan su ndre sulo-on. Iy indre-et ile eriy pe ihposan ipe huyen.

²⁶ Pe Petngendrei ipe ihpa, “Mahkele eri tidu kawe tidahnán ndramat hahpa ndre tidu. Kile pe su we mada su kise pule-en ni, nenka-an pe ka-an odo hangahang pe puyep, mandra-ané pe mo-one.”

²⁷ Ile pe Petngendrei ihanan ndramat ihpa ke ndre iy.

Iy ihanan su hala pedih pe kamal.

²⁸ Iy ipatihi horu pe ipe ihpah, “Orpo nedu oruu hala sulo-on, pe hasarpat hala lokpoi ndre mandra-an, pe mada su kise eriy. Yu uduwe oruu mada oruu kise pule-e su ni, su ka-an pe su nenka-an.”

²⁹ Petngendrei ipe ihpah, “Sane mbrweng kei handrai pe handrai ndre yu undretawei eri ana oruu odo yo-on.³⁰ Odoke su ka-an pe nenka-an eri ana su song ti mundriu pe ndrokei orwon.”

³¹ Petngendrei indre-et ile sane ndre sulo-on ndre iy indrahnán indrinum ti pe, ipe huyen pe ihposan lakopwi. Lukumwen inum pe meseren ihir. Iy eti rang on (6).

¹ Petngendrei ke indrahnan sane ndre sulo-on odo lokpoi pe lok eleng indrinum, takokopwe ile eriy.

² Pe idu rang ndrodul Petngendrei indre-et ile pule-en sane ndre sulo-on ndre iy indrahnан hondrunum ti pe iy imyau.

³ Petngendrei ipatihi rang ndrodul pe itnembruwen, odosa marai ndre sulo-on ti iy indritakokopwe indrinum, pe iy imyau idu eriy.

Adam pe Iv

⁴ Sane odo lokpoi pe lok eleng eri hehir ihpa ndre kurtih.

Kalmene-en Lapan Petngendrei ihanan lokpoi pe lok eleng,
⁵ eri iy ihndrahnан lengin indrundrut mapwi, pe homou ndramat
odo po marian ndrohun tehe sane mapwi. Ile pe sane kei pe
sane mundriu henderenge mapwi. ⁶ Lengin isendrut mapwi,
odoke wo inu-us lon poi isa ndritan pe isonolwi poi. ⁷ Inum pe
Lapan Petngendrei ikuni poi se, pe iyepisi ndramat kamal ile
eri. Pe Lapan Petngendrei iruhi ngohon ile lon ndrongon
ndramat. Ndramat ti ihu ngohon pe ile moren.

⁸ Inum pe Lapan Petngendrei iduhon poi hombrul ise Iden, pe
iduwe ndramat ndre iy iyepesii eri imin eriy. Iden ti ile wuron
rai eh. ⁹ Iy iduwei kei handrai pe handrai rahyen su, pe mbrwen
ti huyen odo yo-on, eri hehir odo pule-en poi Iden. Idu
ndrokoron lok eriy, eri kei ndre ru-iy. Kei he-ei odo hasamat
pwi¹, pe kei he-ei eri intawei tawene odo sane huyen pe sane
mo-on.

¹⁰ Wo handrang ihtot iyin Iden pe inahnan sane henerenge ile
huyen. Iy ihtot ile ndre kan ti pe iltalngan iy ile wo mandra-ane

¹ *kei odo hasamat pwi*: Tok Pisin, diwai bilong givim laip.

ndre haandrang. ¹¹ Wo handrang eri Pison, isongoran lok Havilah. ¹² Gol huyen, pe kei handrai menuhun huyen, ndrodan ndre pat handrai huyen he-en lok eti. ¹³ Iy handrang eri Gihon isongoran lok Kus. ¹⁴ Iy handrang eri Taigris ihtot ile wuron rai eh odo lok Asiria, pe iy handrang yi eri kah Yufretis.

¹⁵ Inum pe Lapan Petngendrei iduwe ndramat kamal imin pule-en poi ndre iy indretohon odo Iden, kile pe iy we kina-an, kimpo marai pe madan kiso eriy. ¹⁶ Lapan Petngendrei ipe ile tadan ihpa, “Ou oyo-on mbrwen kei ndre sulo-on odo poi keti, ¹⁷ odoke kei ndre intawe tawene huyen pe mo-on eri ou oyo-on mbrwen kolwii. Uh ou oyo-on eri we amat kidu ke ndre rang etih.”

¹⁸ Eri pe Lapan Petngendrei ipe ihpa, “Ndramat kamal iy ko homou imin eri mo-on. Yu we kuhnan homou kouson odo henuwii iy.”

¹⁹ Ile pe iy ikuni poi se, pe iy iyepisi su ka-an pe nenka-an ile

eriy. Inum pe iy ikuni su ile hun ndramat, ile pe iy kindre-et ndramat kitou ranga su. Iy eti uu pe ka-an pe nenka-an handrai handrai ti ndre ranga su iyenon eh.²⁰ Ile pe ndramat kuti iduwe ranga su ka-an pe nenka-an ndre sulo-on. Odoke homou ihndrapah ndre iy ti pwi pe indrila huyen odo we kile kouson eri pwi.

²¹ Eri pe Lapan Petngendrei ihanan ndramat kamal imtir tuu, pe iy irwi ndruwin kohlon he-ei, inum pe isokopti yi,²² pe ihtungon pedih ihir odo ndruwin kohlon iy kamal. Inum pe iy ikuni iy pedih ti ile hun iy kamal.

²³ Pe iy kamal ipe ihpa,

“Kah tapa kede! Iy kuti ihpa ke ndre yu.
Ndruwin hokuni odo ndruwi pe
sengin odo engni.

Petngendrei ihtungon iy odo ndruwi,
ile pe rangan ‘pedih2’.”

²⁴ Iy eti uu pe kamal ina-au odo hun taman pe tinen pe inohtok ile ndrodan mbrulun, pe horu harla ke ndramat homou.

²⁵ Kamal pe pedih ndrihi horu kepwi, odoke horu tuno horu mahah pwi.

3

Mumutnon Ndramat Mo-on Sa

¹ Lapan Petngendrei ihanan ka-an ndre sulo-on, odoke mot eri tawene tadan elwe-en lakopwi, iyin pule-e su ndre sulo-on. Mot ihndramtan iy pedih ihpah, “Erih? Petngendrei ipe we oruu oryo-on mbrwen kei odo lok keti pwi?”

² Pedih ipe ihpa, “Oru we oryo-on mbrwen kei ndre sulo-on,
³ tapa ke mbrwen kei idu ndrokoron lok, eri Petngendrei ipe we oru erndretukunii pe erndreyo-on pwi. Uh oru ortukunii ndre pwi oryo-on, eri oru we armat.”

² *pedih*: Ile nolou Hibru ti kuruwen ihpa ndre nolou Hibru *kamal*.

⁴ Mot ipe ihpah,
“Iy intaheweh, we
erndremat pwi.

⁵ Petngendrei
tunon, ipe kihne
oruu oryo-on eri
we arahpa ndre iy,
we orohtuno oruu
sane huyen pe sane
mo-on.”

⁶ Pedih indre-et ile
kei kuti pe kei ti rahyen
lakopwi pe mbrwen ti mondrop on pe huyen odo yo-on. Iy ipe
kihtunon sane posingat, ile pe iy iyehi mbrwen kei se pe iyo-on.
Inum pe iy itou se ile tan mbrulun pe mbrulun iyo-on yi. ⁷ Horu
harani mbrwen kei inum ti pe mada horu ipahar lakopwi, pe
horu horohtuno horu ihpa ndre horu tih ndrihi horu kepwi. Ile
pe horu hersokopet ndrokei ile ndrihin horu pe hertese.

⁸ Lok ndre ipieh ti horu hertahrungi ngasan Lapan

Petngendrei
inelila ipei. Ile pe
horu hortudong
tadan harla
siliyen kei.
⁹ Odoke Lapan
Petngendrei iyuu
iy kamal, “Ou
ana kehe?”

¹⁰ Iy isomwi
ihpa, “Yu uhrungi
ngasam enelila pe

yu unuh pe utong tadam, odo yu ndrihi pwi tih.”

¹¹ Ile pe Lapan Petngendrei ihndremte, “Ou tunom ihpa ndre ou ndrihim kepwi ti ihpa he? Si ipahran ile tadam? Ou ti kihne andrani mbrwen kei ndre yu upwe ou oyo-on kelwii tih.”

¹² Kamal ipe ihpah, “Pedih ndre ou edwei iy imin ndroda yu, eri ihngahang yu pe yu uyo-on.”

¹³ Lapan Petngendrei ihndramtan pedih ihpah, “Ou opo erti ile homosa?”

Iy ipe ihpah, “Mot ipusahi yu pe yu uyo-on.”

Petngendrei Itou Pede-en

¹⁴ Inum pe Lapan Petngendrei ipe ile tan mot ihpah, “Ou we okun pede-en odo homosa ou opo kitit.

Ou kopwi odo lengan su ka-an pe nenka-an, idu mahkele pe ile,

eri we enelila kile ke mburndrinem, pe ana-an wambruhen poi.

¹⁵ Yu we kuhnan ou pe iy pedih, we erehbore oruu oruu.

Su nedun pe su nedum eri we hompo ke pahun kile pule-e su.

Su nedun pedih ti we hantatawe palam pe ou we eneti ndrike su.”

¹⁶ Lapan Petngendrei ipe ile tan iy pedih ihpah,

“Yu we kuduwei pede-en kile mundrem kidu ou ndriyem, pe ngendre-en mandra-an we kile tadam, kidu ou otou nedum.

We elnget ngendre-en, odoke reh tadam we kinto kendre tan mbrulum,

pe ou we emin ke ndre pahndran mbrulum.”

¹⁷ Pe Lapan Petngendrei ipe ile tan Adam ihpa, “Ou ohrung mbrulum pe oyo-on mbrwen kei ndre yu upwe ou we onyo-on

pwi.

Eri, yu we kuhnan poi kihmo-on, pe song we hendrerenge
huyen pwi.

Ou we ndre opo marai puko-on, pe anam song kenon ou.

¹⁸ Mundriu pe oskwei pudon we hernge pe hosorohe lok,
pe ou eri we oyo-on sane henerenge odo langah.

¹⁹ Ou we opo marai kile puko-on pe panohyum kihir,
iyenon ndre ou ala yi ndre poi ndre ou ehir eriy.
Ou ehir odo poi pe we ala yi ndre poi.”

²⁰ Adam iyuwen rangan mbrulun eri Iv odo iy we kile tinen
ndramat ndre sulo-on. ²¹ Pe Lapan Petngendrei ihnan ndrihi
horu odo kalatun ka-an, pe Adam horu mbrulun hertasan.

Petngendrei Iyes Adam pe Iv odo Iden

²² Inum pe Lapan Petngendrei ipe ihpa, “Ndramat ke indrahpa
ndre homou ta tidu. Iy kah tunon sane huyen pe sane mo-on.
Ile pe iy we ke-eu odo Iden.

Kihne iy kimin ti pe kiyo-on mbrwen kei odo hasamat pwi, pe
kindrimat pwi.” ²³ Ile pe Lapan Petngendrei iyes Adam iyeu odo
Iden, pe ilpo marai ile poi ndre iy ihnan iy ihir odo eriy. ²⁴ Lapan
Petngendrei iyes horu odo Iden inum oh pe idwe su engel hala
ndram. Pe Lapan Petngendrei idwe semel hondrou inehnelem
ihpa ndre ndremleh idu sal ise wuron rai odo Iden. Kile pe
homou ndramat kindranon kinna mukehe kei odo hasamat pwi ti
pwi.

Lin 1-15

Genesis 1-15

Kurti Bible Translation Group

Trial Version, July 1999

Printed at: Ukarumpa, EHP

ISBN 9980 0 2240